

適園叢書

張宗祥



通國書香

吳昌碩



滋溪文稿卷第十一

碑誌五

元故贈推誠效節秉義佐理功臣光祿大夫河南行省

平章政事追封魏國公諡文貞高公神道碑銘

有序

仁宗皇帝延祐初元召江浙行省左丞高公復拜中書參知政事公以母老乞歸養

上不許留爲集賢學士商議中書省事是歲十月母夫人卒公護喪歸葬明年用起復故事擢拜江南諸道行御史侍臺御史又拜樞密副使皆不起

上簡注公不忘又明年冬遣使趣召仍命之曰汝以大祥日至則能爲朕來矣使者果以其日至公惶懼不敢辭既至入

見便殿

聖眷優渥卽日命近臣送至中書參知政事四年進階資政大夫遷左丞五年升資德大夫遷右丞公自早歲已在朝省練國故實凡選舉錢穀決獄悉其原委事物之至應之間暇尤善用一時人材能布列中外或承時好黨同惡異公曰任人各以其材不可妄有分別也當是時

仁宗皇帝事

皇太后孝養順承惟恐不至而

英宗皇帝方育德於儲宮公與一二大臣同寅協恭承弼輔贊俾三宮怡愉九有清晏年穀豐衍民庶樂康是則公之相業最著者也然小人不便陰偵潛伺思有以害之七年春

仁皇不豫鐵木迭兒已在儲宮左右譖言倉廩空虛傳旨命

具錢穀大數以聞公曰某等備位宰府輔政興化用賢理民乃其職也至於錢穀自有主者彼聞之益怒居無何

仁皇賓天英廟未立鐵木迭兒遂爲丞相擅政肆虐盜弄威福睚眦之怨無不報者以己曩者得罪憲臺公等坐視勿救心尤恨之乃以公及平章王公毅參議韓公若愚徵理錢穀又屢揚言

上前以爲

世祖之時幣朽於庫桑葛嘗奏誅其執政二人蓋欲以此譖殺公等賴

英廟察其無罪第罷其所居官放歸田里公始以同知中政院事特拜中奉大夫中書參知政事明年至大紀元冬十月

武宗皇帝親祀太廟公充讀祝冊官禮成錫與甚渥二年尙書省立議更鈔法公言鈔今已虛數倍若復抑之則鈔愈輕而物愈貴非法之善也時不能用其言出公爲浙江行省參知政事有旨範京城新寺供佛銅器以行省督視之期已迫銅不能具或欲銷省庫錢以充用者公曰歷代泉貨孰敢擅毀有頃詔發庫錢與楮幣兼行眾方服公之識海舶歲運米數百萬石以食京師官爲給其道里費然歲久法弊及民者十蓋一二至是朝廷命公領之分毫悉給於民公以海漕官吏出入風濤百死一生勞效殊甚請優其序遷以勸來者廷議是之著於令進拜資善大夫本省左丞會平章張瑄請括江南民田以益賦稅公言國家承平日久賦稅皆有常經民

心一搖恐生他變已而迄如公言泰定之初詔以鐵木迭兒
專權蒙蔽報復私仇杜塞言路構害忠良等罪播告天下而
公等始獲昭雪矣超拜榮祿大夫湖廣行省平章政事佩金
虎符節制諸軍時兩江岑黃數爲邊梗公請於朝曰蠻夷之
人僻處遐荒撫則治擾則亂自昔然也竊聞岑黃初則未敢
猖獗蓋緣招諭官吏恣意貪求或不如欲輒復以兵威之遠
人由是不敢效順前廣西僉憲奧屯忽都魯向嘗按臨其地
威惠並著若命爲本道帥使則岑黃可不招諭而至矣詔從
其請岑黃聞之踊躍語人曰吾豈惡生樂死者耶今奧屯侯
來吾無患矣乃相帥請附他夷小醜亦皆向化焉事聞詔賜
公玉帶弓矢鞍勒以旌其功歲餘改江浙行省平章政事江

左繁富中外徵求百至公熟知其利病又得脫歡答刺罕爲
相同心輔治事務簡靜不擾以是民用寧一致和改元春海
潮日溢齧鹽官州其域將陷浙民大恐敕使者數輩行視眾
議累石爲岸以捍海公曰政事弗修則變易數見今海水爲
災殆陰盛陽微之咎第君臣修德恤民庶幾可彌若復勞民
愈爲不可夫海患不息浙西已弊又爲石岸則害及浙東且
石岸延袤百里功非十年不就而海患近在旦暮比岸成兩
浙之民俱爲魚鼈矣眾是公言未幾海患亦息是則公之謀
國保民世所共聞者其陰爲彌縫補益人受其惠而世不及
知者則亦不得而書也公諱昉字顯卿世爲遼東右族國初
始遷大名少美風儀神觀高朗涉獵書史考求前代治忽君

臣得失與夫應時合變先後本末之序期於有以發爲論議措諸事業以表見於當世焉甫冠游京師名聲藉甚會立集賢院以學行辟爲掾國有大政集諸老議之公屢侍行而聞見益博擢都省掾故相何公榮祖器其材以公輔期之調吏部主事建言仕者歷履歲月治行廉貪無由核實吏得並緣爲姦宜書於冊置局司之遷左司都事又遷員外郎承檄調廣海官人稱其公還爲禮部郎中奉詔慮囚燕南活冤獄若干人改吏部郎中時入官多途選授無法公請除文墨士爲長吏雜進者貳之由是選法清而眾職舉遷禮部侍郎浙西豪民卽所居爲佛廬舉度爲僧尼號其教曰白雲宗日誘惡少肆爲不法奪民田宅奴人子女郡縣不勝其擾中書以聞

公承命按治凡得民田廬若干所還爲民者若干人賄賂沒官者若干萬浙民大快時順德忠獻王當國選公爲左司郎中贊畫政務居多嘗以言忤權貴出爲潭州路總管潭爲湖南大郡訟牒填委公決治明允頃之訟亦衰止郡吏求補者眾公曰以所決事試其可用者得數十人部民有詐稱載敕制者逮繫數百公詳讞之止坐二人餘皆釋不問貴官僣從恃勢擾民公痛繩以法部內清整憲司以治聞潭最人方樂公政而公召爲中政矣公養母甚篤居喪如禮孝行聞於郡國爲人清簡寡欲齋居晏坐終日默然及臨大事敷陳宏辨咸中肯綮字量宏深嘗曰人能容斯足以任天下之責能忍斯可以成天下之務又當以靜爲主焉故以主靜名齋蓋本

太極圖訓云天歷元年九月公偕行省臣五人赴召入朝十月十有九日行至陵州公以疾薨春秋六十有五明年二月十有五目葬大名元城縣令公鄉先兆曾祖考植金洛州防禦使皇贈通奉大夫遼陽行中書省參知政事護軍魏郡公妣大氏魏郡夫人祖考世榮金近侍局副使皇贈資德大夫河南行中書省右丞上護軍魏郡公妣王氏魏郡夫人考昂仕國朝爲濮州朝城尉累贈榮祿大夫江浙行中書省平章政事柱國魏國公妣郭氏孫氏俱魏國夫人公配蒲蔡氏清豐縣監某公之女早卒麻氏太醫院官判贈大司徒恆國文惠公澤之女亦先公卒俱追封魏國夫人繼白氏子男三人履補國子員歷官戶部司計工部司程監察御史浙江行省

左右司郎中恆以公廕爲太府監右藏庫使河閒路總管府
治中皆以材能清慎聞麻夫人出次側室王氏出也孫男二
人女一人

今上皇帝褒錄舊臣制贈公推誠效節秉義佐理功臣光祿
大夫河南江北等處行中書省平章政事柱國追封魏國公
諡文貞始終哀榮可謂備矣公昔按白雲宗獄先君以戶曹
掾從行屢蒙薦擢進長行省幕府遂以公爲知己公薨諸子
以神道銘見屬故天爵不敢以蕪陋辭蓋庶幾先君報德之
萬一也銘曰

維高著姓世家渤海歷遼與金闕閱弗改桓桓太師育子十
人列官節度冠蓋如雲慶流於公嗣德惟肖風度雍容訐謨

廊廟肅肅長樂

天子孝恭亦有春坊敬罔不同三官雍雍百辟侃侃民樂治
平匪爾伊遠曾是疆禦肆爲詆欺惟

天子明公歸祁祁公歸祁祁於魏之野徵車旣來星言宿駕
猺人猖狂公務允懷海水齧城於時爲災公言 君臣當務

修省民不可勞忠言炳炳維此江左地大物繁公治以簡民
其孔安昔公早年令譽已著故老歎咨期以公輔通材達變
臺閣踐敷克有令子保公烈光公雖云亡德業愈偉何以徵
之國有信史令公之鄉豐碑穹然勒此銘詩永表相賢

故少中大夫同僉樞密院事郭敬簡侯神道碑銘

并序

至大二年夏六月癸酉少中大夫同僉樞密院事郭公薨於

京師私第冬十月庚申歸葬中山無極縣歸化鄉龍泉里延祐六年公之子中書省照磨元珪始屬天爵狀公行請封諡於朝廷制贈大中大夫廣平路總管輕車都尉追封太原郡侯諡敬簡至正七年公之孫鏞乃克伐石樹碑神道後以銘文見屬於是上距公薨三十九年蓋先子嘗侍公於樞府天爵與元珪故往來今鏞是請及見郭氏凡三世矣故勿庸辭昔者

世祖皇帝臨御天下封殖賢才興崇治功一時文武小大之臣歷乎

成宗武宗之朝首克有用於世皆樞密敬簡郭公亦其人哉公諱明德字德新少長儀貌偉然內能兼人至元初天兵圍

襄有詔募民爲兵公出應募中選其父曰兒雖長大年未成
童恐不堪用縣尹馮帖試以弓矢公蹶張挽強尹曰可矣樞
密張公易聞其才勇留之樞密會立屯田總管府因署爲史
轉前衛史諸王乃顏叛東土以親征之樞密大臣扈行公被
選分掌幕府文書間亦執兵禦敵有勞獲賜鞍馬及還擇密
院架閣庫管勾改斷事官知事前衛經歷遷擢樞密院都事
同列坐事辭誣逮公人共免之公曰吾寧忍自解以重人之
罪乎未幾或告樞臣及其幕官貪墨獨無公名臺臣疑之告
者曰郭君實無所私臺臣始知公前時爲眾所誣也大德初
擢拜中書省檢校官遷工部員外郎五年京師大水瀘溝泛
溢決牙梳堰壞民田若干頃廟堂檄公治之公命伐荆爲巨

困實石其中以殺水勢使復故道而隄遂完自京城至涿道
塗輿梁爲雨水所壞者公相地所宜皆改爲之或涉民田則
厚價以買之故事集而民不擾六年海都犯邊邊民大驚宣
慰司悉焚倉廩獨輦金帛南徙久之方定選官撫治公拜宣
慰副使僉都元帥府事賜金虎符佩之時方隆冬冰雪載道
或止公緩其行公曰某起寒族誤蒙拔擢至此敢稽天子之
命乎明日遂行至則撫綏完復邊鄙肅然乃陳脩邊數事其
說曰安邊之策務在屯田積穀且耕且戰自古如此今兵屯
北邊有年所須錢不少然歲歲而輸之運米一石其值中統
鈔百餘貫貴則倍之使山北每歲有秋輸米者其家富完委
輸官不敢爲姦加以路無盜賊之虞僅可供一歲之用苟或

不然利害非細今和林之北地宜麥禾昔時田器在在有之
夫京師六衛每軍抽步士二人屯田以供兵士八人之食和
林寒苦漢軍不能冬若於蒙古諸軍揀其富庶強壯者戍邊
貧弱者教之稼穡俟其有成如漢軍法以相資養置田官起
倉廩嚴賞罰以課其殿最或天有霜旱之災募民入粟塞下
厚直酬之和林之錢或不足償以江淮長蘆鹽引償之則數
萬之粟可坐而致此外別立轉道買牛二萬頭車二萬輛用
軍士四千人月給米三斗自大同達和林止四千里百里
置一驛用軍士百人車五百輛配牛五百頭可運米二千五
百石三日一返一月運二萬五千石十月二十五萬石何患
軍儲之不足歟又曰武欲勝敵宜先練兵夫兵在精而不在